

四庫全書

集部

欽定四庫全書

儼山集卷五十

明 陸深 撰

序十四

書輯序

前代書家之論著洋洋乎其備也大抵文過其質寡
要約焉予之輯此也擘百氏之菁華示一藝之途轍庶
使後來求方圓於規矩將由下學而上達也顧微辭與

義攬取牽聯既已成篇似為已出不幾於掠乎若夫一章之中畢還衆善則今古迭形難以倫序尤乖櫟括之體今故會萃諸家首條品目庶幾博洽之士知所由來云爾

書輯後序

予少溺志於書無傳焉而未有所得也頗喜考尋前人之遺論纂輯既久恍乎若有以見其指意之所在而亦未敢遽以為是也中歲以來抱詞賦之悔不復數數然

正德戊寅假館老氏之宮新涼病後再加刪次深懼古人之法不盡傳於將來也昔人有言經術之不明由小學之不振小學之不振由六書之無傳嗚呼余亦安敢少哉

送沈員外歸省序

沈君仁甫副郎之積勞六年也疏以歸省請上若曰其如故事吏部覆實以聞俞之遂特給寶楮廷辭而還吾鄉之士大夫皆來諗于余曰仁甫不宜去今上新政

百度更始賢才焦勞時也巖穴之下思奮負一藝者畢
呈況如仁甫者獨得優游遂其私於若時乎是一不宜
去昔仁甫為主事也其屬衆其事分猶可逸也今副郎
矣衆者以一分者以萃當兼晝夜為之固其職也是再
不宜去又況仁甫刑官也民失其教罪戾沓冒輦轂之
下大抵尤甚思得執法明刑者雖百十仁甫猶將少之
是三不宜去太保閔公以其才也屢用之以裨左右遇
知己又一時也是四不宜去仁甫皆不顧焉以去不幾

乎薄於君隳於業懷其實以負於所知者乎余曰否仁甫之去無不宜者謂不宜去者愛仁甫有焉非通於情者也人之情未有薄於其親而厚於其君者也況其他乎昔者溫嶠弼成江左后卒不償其功徐庶辭其主於國事倥傯之日至今以為得事君之體夫二子者當其時也各有所急及其獲乃其所緩君子亦量其情而已矣所忽於不情者謂其不可以訓也若仁甫者自始登進士尊翁即背養夫不及養其父獲其母是其情已難

安矣又况越在數千里外無他兄弟為侍獨能一日安
其情耶維我朝以仁孝立國著在甲令缺曰有六載不
歸者例得解職暫還仁甫不於此時缺何去衆皆曰諾
遂請為贈余與仁甫通家兼有世好知太孺人春秋方
鼎盛又賢也望於其子者匪獨一歸省之榮而已仁甫
亦思所以孝於親尚有大於是者乎誠有之是宜速來
去而不來始無以自解於衆口矣仁甫亦曰諾遂為叙

梅林續橐序

梅林蕭先生詩沈生銓既刻之嘉禾余既序之矣陳生
憲復裒為此集復徵予序銓憲皆嘗學於梅林夫學者
於其師之言行惟恐不致詳焉況於其成章者耶此集
之所不容自己而亦非梅林之所能禁也刻成予卒業
焉歎曰有物於此為世共寶然祈人之愛弗可得也有
物於此為人鍾愛然祈世之傳弗可得也是故黃金白
壁世寶矣廉夫或睨之而不顧高官大爵人愛矣貞士
或推之而不居寶斯愛愛斯傳者惟文章為然凡以有

定價也定價云者抑之不能使短揚之不能使長得之
足以致治失之足以召亂一時之所未融萬世之所必
白者也茲集也本之性情而足以考見治亂興衰之故
學者有興觀焉梅林冲遠高簡不隨世汨沒其為詩淵
源於魏晉而涵濡於唐人之風者甚深故其所就亦非
世所得而抑揚也信哉寶斯愛愛斯傳矣陳生曰以憲
之所睹記不可誣也請書為序

縣侯張八峯膺獎序

嘉靖辛丑歲八峯張侯以名進士令上海再及朞矣適
監察御史高君奉璽書按吳越間覩侯之政有成也將
以聞于上先下檄獎之邑之諸寮以御史知侯之深也
信之其詞曰持守謹確幹理周詳清宿弊而邑政新敷
實惠而人心悅蓋實錄云於是邑士大夫咸信之外邑
之士大夫亦信之惟邑之民以侯之聲望起而將去吾
海也則又慮之深方蒙恩歸田會見其事乃喜之蓋喜
侯之獲乎上信乎友感乎下而才賢之將得路也貳尹

何君實文君觀光李君中允幕史陳君相相率來請為
賀惟我皇明建官經國法意相維是故以公論付臺諫
以民社寄有司良有司盡職于六官以當臺諫之激勸
故天子高拱穆清之上而四海之治成矣詩書所稱何
以過此雖然此有毀譽焉此有明闇焉古諺有之受君
子與則多榮惟御史公惟侯誠相濟以功業則我朝之
法意具存而漢治之循良可幾也固宜賀顧吾邑在東
海之上地僻賦煩歲供至數十萬而非時之需不與焉

邇年以來民日貧而風俗日壞天下稱劇而今尤難侯
之來也宰輔實以難邑試侯而侯不動聲色處置有方
若解牛破竹然百事就理人徒見侯寬大之規模與豈
弟之治理而或未知侯之有本也大抵有諸中則外施
無不宜有所養則外應無不當語曰本立道生御史固
廉得之矣憶昨戊戌天子臨軒策天下士於廷深以職
事克讀卷之末偶觀一對甚佳竊以為此他日宰輔之
器自閭老而下相注目焉深私識之及啟封廷唱則侯

也今世學術高者纂宋儒之講議務為擺捫之詞以譁也其下者則獵取腐爛時文之語以合程式君父前殊歎大觀惟侯之文超然遠邁直據曾臆於藹然忠孝之風其大本已如此是科兩主司為顧文康公未齋張少宰甬川皆予同年又同在館閣每詢之必擊節以為然夫學與政通則侯今日令海之政特一斑爾是殆未足以盡為賀也何君輩固以請深方欲論次侯令海之尤難者庚子之秋海沙盜起兵犯太倉勢甚張邑且剝床

士民望烽煙而奔竄者巷陌相屬呼號之聲與風俱烈
時丞佐咸闕以一身當之飭兵食謹瞭探馳驅鋒鏑之
間而戎務悉備賊幾及境若望之而退者百萬生靈賴
以衽席侯固吾海邑之長城也此尤宜賀御史專理鹽
政詞筆所未及深將附御史欲併以聞于上何君輩咸
拜下曰此寶等之所未知也遂書為序

送王君世熙授職南還序

王君世熙八九歲時默誦書傳歷法甚習長老以為奇

其自少警敏如此少長為舉子業輒有奇語遊泮庠既而以為不足為乃棄去從豪俠士日夜飲博千金一揮不難也其雋爽又如此余家與世熙家鄰也頗憶其少事又與之同遊泮庠故得其人焉比余竊祿走兩都別世熙且五六載世熙亦已三十餘矣乙丑之歲會于金臺執手敘舊殊非曩之王世熙也日居小樓讀書自娛足不履戶限外客非相知罕見其面周旋曲折動合矩矱何其爾雅儒者也蓋郡邑以陰陽訓術薦起將世熙

別後從事於天官之學而有得耶不然一變至此何其
美也大抵天官之學上窺消息之妙俯察流峙之機中
稽人物之變類非麤心所能勝也世熙脫壯年之習以
返儒者之故其為不負此職也明矣雖然是學也本吾
儒者之事窮理盡性則得之矣自史遷作天官為日者
立傳始裂而外之後世往往取其恠誕不經之說風角
占驗之術附會砌合自成一家而聖人齊七政授厯明
時之意遂微蓋二千年於茲矣世熙自少即有志於厯

法今果以是進用儻能推明尚書之旨以復還吾儒者之舊而不以術自小焉則又豈非其善變哉孔子曰齊一變至於魯魯一變至於道余有望焉茲奉部符南還將以蒞政也吾友郁行人希正舉其職以告之盡矣余獨愛世熙之屢變以趨於道也故復以是贈之吾邑種竹主人者世熙之師也雲谿居士者世熙之友也兩人者皆予之知己儻問我為謝之曰脂韋甚矣往時坐竹所據溪上臨文賦詩自得之氣十失八九若余則為不

善變者也於世熙之還也寧無慨且愧乎

送某先生閩省校文序

科場取士得士之高下視主司主司亦以所得之士自
驗其高下是故聘必於名士大夫士大夫亦以得聘為
榮歲在丁卯今上改元之二年秋適當天下大比於是
某應閩省之聘先生浙產也而校文於閩閩浙壤相接
也文相上下也閩之必欲得先生而先生必不薄閩而
不為也已夫以今同文之世而先生知文之深無不可

者顧亦何擇於閩哉閩山水奇絕靈秀所涵必有瓌璋磊落之士將待先生以收之或有右於他方者矣吾聞閩有佳實號荔子者味甲天下今之適閩者口不嘗荔每以為恨夫天地清淑之氣鍾於物為奇品鍾於人為奇才適閩而不食奇品猶以為恨况適閩而不得奇才者乎且荔子之味不過美人口腹况人才可以美皇猷美天下相去又萬萬者乎先生必加之意矣他日閱鄉書見名士滿紙則可以為先生賀得閩士為閩士賀遇


先生而聘者不失人是亦可賀矣先生行哉深請俟之
錦衣千戶陶君五十生子詩序

產子何賀成孝也或曰禮無賀余曰不然古之君子其
心必於人倫是厚其為教也必以厚人倫為本是禮之
所由起與協於義以合乎情故無得而泥焉人之有子
也由吾而上不知凡幾世也得以續由吾而下不知凡
幾世也得以引吾而續之孝有承於前吾而引之孝以開
於後其於人倫不已厚乎古之君子必將歌艷揄揚以

成之惟恐後聖人不著之於經者常之也事皆由常多
不見其迹惟有出於常之外者則其歆艷揄揚之情殆
且過焉而不自知者勢也苟不害於義以拂乎情獨不
得附於禮之遺意也哉若吾陶君以五十之年始有克
問之慶情慰於久望孝立於幸成其賀之也尤宜凡今
之君子起為陶君賀者余推其意以為有合於禮也陶
君吾故松人也由先世北徙至君起家為錦衣衛千戶
余以里閭故獲識君魁梧偉傑心固異之繼聞君談兵

事絲理派分有源有緒又異之最后見君上天子封事
一帙鑿鑿時政得益異之其先悉疏令錦衣衛之宿
蠹巨害積數十年者將以陳之於上今夫各覆所司之
短以成輔車之勢者世之通患也在武弁為尤甚陶君
知明而勇達奮不顧私一旦慨慷累數百言有人所陰
諱而私忌之者求之儒紳亦難矣於是異之不已乃退
而歎曰孟子稱始作俑者無後惡其不仁也若陶君其
必有後矣夫今果然將非一念之仁所感召與由是見

全一八八八二
卷五
天理不爽之妙且以幸余言之偶中也遂不辭而為之
序君名淳字克清產子之辰為某年月日云



儼山集卷五十

欽定四庫全書

集部

儼山集卷五十一至

詳校官庶吉士_臣李如筠

中書_臣劉源溥覆勘

總校官庶吉士_臣何思鈞

校對官助教_臣卜惟吉

謄錄舉人_臣蔣雲師

欽定四庫全書

儼山集卷五十一

明 陸深 撰

序十五

送光祿卿張南山先生致政序

皇帝青宮之臣最舊者宜莫如南山先生焉先生起家
中舍明年召直文華殿累遷至光祿寺卿四十有餘年
矣中間嘗佐天官參大藩登容臺實未嘗去文華一日

也是故最舊昔人以一生仕宦不出國門者為榮且幸於先生何如也先生工書翰富文藻長箋大幅幾徧海內人爭寶愛之雖兒童婦女皆知有先生焉是故於宮僚又非特故舊而已今上既光臨大寶先生年且八十矣抗章請老上念其賢且舊為特允之又以給驛請復允之蓋異數也昔人之歸道出上東門外觀者歎息再三曰賢哉彼固見幾而作者耳人猶賢之遭逢明聖晝繡而還於先生又何如也竊嘗觀造物於人若故忌之

吾不知其何理也長於文墨或累以政事使之不得盡其力享有聲譽或終其身與之焦勞焉其於功名之際尤所吝惜竟不多使之完以去也於先生獨不然鳳池綸閣之上未嘗有簿書之擾姓名滿四海未嘗一日輟賦詩飲酒之樂金紫纍纍歸而為江山風月之主載籍所稱如先生者寧有幾人哉而先生身有之未必知其榮且美若是也自今之觀於先生者不知何如其景慕歎羨耶又安知後之觀於先生者不如今耶雖然世未

必盡如先生也蓋其文以書掩才猷以高暇掩今所稱者率其緒餘耳深嘗得先生一事於隱微中真可以立頑而勵貪也方孝宗萬幾之暇雅意文事多所述作每一書進御儒臣類有陟賚酬勞也先生修詩海珠璣成例得進階乃獨辭免由是觀之其廉退之節所可傳者又於是乎在是豈偶得於天而徒有所享者哉深少聞吾松有二張先生者博學洽聞人望也蓋謂東海公與先生爾不幸生也晚不及遍遊諸老之門愧方登朝而

先生又去矣考德問業將安適從能無眷眷於懷乎故受命於長者之前濡筆為敘云

送沈西津憲副赴陝西序

按察使之制視都察院故曰外臺臺以司法也其設官視內臺畧降一等其貳亦有副有僉自按察之副而副御史大夫亦再遷而已其有卓異者或遂遷固非特以其官而已矣亦其道之易以行也副使之職總持法令以振肅寮屬專之者刑獄也有平反之道焉視刑曹理

寺吏之貪廉才不肖得坐而進退之視銓衡有兵戎之
寄者視司馬有學校之責者視禮曹國監獨錢穀不與
焉則又取於才之備也吾友沈君仁甫自刑曹郎中遷
為陝西副使上將有意於仁甫而大用之而將藉是以
為之階也雖以仁甫之才亦將階是以為之地也而自
致之大用也秋官張君九苞屬予贈之蓋予三人者其
居同里其學同業同朝同為世嫻而予又職文也當言
夫言者行之標也知者行之宅也孔子曰有德必有言

易曰知至至之謂言與知之重也故言而不能行者誕也知而不敢行者弱也非言與知也天下之大業存乎人成天下之業者存乎學擬之而後言致之而後知斯學之道也仁甫長於論議而明於理名位所極宜仁甫之自有者矣獨念少與仁甫同業時遂有斐然之志既而以言後先見錄中遭棄置兼罹憂患杜門家居者有年矣得從仁甫並辯天下之故考求古人之迹以合當世之變其成敗利害若有可言者矣今上起廢之餘予

尚無所於見而仁甫固得行之也豈非予之願哉雖然
言之難孰與知之難也知之難孰與行之難也議論他
人之失得孰與我之自見之行也行矣而不槩其所言
至忘其所以言者而變之而復以近似之一說自諉則
予誠誕漫無稽而負仁甫多矣今陝西督學則朱君升
之備兵則張君廷紀二君盡予之所交而當世之望也
仁甫往參其間相觀而善陝西按察之政必將為天下
冠矣予又當書乃序以別

為已方序

予喜手抄書方時少壯夜寒鑪火不廢泓穎今五十有六年矣衰病垂及乃喜抄藥方予外病病齒最先最甚故抄方自治牙始其次病目而扶衰之方兼抄壬辰春寓榆關久間從諸生借書消日因得寫此嗚呼掘泉止渴求珠目前此予一人之事也杜門集方遐想舊躅此予一家之事也因題曰為已方而序之

送縣侯曹孟輝入覲序

今制凡以四季之年元朔皇帝御正衙大受朝賀而因以行黜陟之典於是京尹岳牧郡守與州縣之長吏罔不精白一心以承德意而異政奇蹟畢以宣揚明廷士大夫往往乘此以赴功名之會而治理於是乎考成焉明年壬辰適當其期而上海令曹侯孟輝治且三年矣遂以上海之異政奇蹟以獻于上先期戒行士民攀留之不可得各次第送之十一月某日縣之丞尉送之既而請贈深適有晉陽之役不及與祖餞後乃颺言而問

之曰曹侯之治海三事踐矣六條舉矣百里之內熙熙
矣是行也當受上賞必矣於是李君申作而言曰侯吾
鄉達也申也賴侯之教水土以平橋梁以建使民不病
於耕涉三四年來民用有秋而生齒日以蕃息深曰敏
矣夫是之謂惠而不費黃君貫惠君應繼而曰自佐侯
以來徵科有度出納惟允貢賦給而民不擾吾等惟蚤
夜是觀是法徵侯貫應不及此深曰恭矣夫是之謂寬
則得衆王君徽又曰徽西人也未諳南土軍鹽之劇侯

嘗命之曰惟嚴而恕可以集事徽是以不愆于政深曰
直而溫寬而栗茲臯陶之令聞也主簿張君相又趨而
前曰惟侯總政惟尉司刑刑之不中政從之隳矣相也
先后左右吾侯又安敢戾和以罔法深曰欽哉恤哉感
而後有應也夫是之謂錫類典史陳君相則執爵以揚
於衆曰侯吾師保也相將從之于邁矣侯有德有才相
無望於萬一萬一相有少愆則貽侯之羞相敢不殫志
與盡力深曰慎矣斯事長事貴之道也夫政有體為政

有序得其序之謂禮被之聲音之謂樂故曰見其禮而知其政聞其樂而知其德觀於此則侯之德政可知已是寅協之衷也仁讓之化也遠大之風也文華之實也治功之成也而君臣之倫朋友之誼於是乎在即此亦可以獻於上矣今天子神聖方以道化天下而尤加意於畿輔之臣侯當受上賞必矣因錄為序以贊侯之行

顧母李孺人五十壽序

東川顧君世安先大父筠松府君之甥草堂先生之孫

省軒翁之子也其配李孺人江灣之舊族也有賢行實
佐世安以承顧宗族黨稱焉一方之人咸以為兩美並
世二氣咸和真一家之禎瑞云乃生六男子三女士而
顧氏之宗益以蕃矣世安博學多才藝以明醫事今上
為御醫領內局有天下之望而孺人附之益以顯矣冬
十月十有六日為孺人初度適開六袞嫺戚媛姥捧觴
稱壽者擁戶歎扉一方之人又以為五福駢臻一家兼
備蓋天下之禎瑞云古稱形和則氣和氣和則天地之

和畢應此類是已而孺人之壽可量乎于時仲子從德率諸弟從仁從義從孝從悌以告曰吾父母之賢惟伯父知之亦惟伯父能言之從德等思所以悅母而慰父者伯父豈有愛乎子諾焉憶昨戊戌之歲予有四方之役不及為世安壽心甚慙焉盍少遲之以同壽可乎乃諭之以俟今年世安奉命使江南得便道過家適及其期此殆至和徵應天之佑善蓋如此乃製為三祝之辭俾從德輩歌之孺人中坐聽之其心有不悅者乎悅則

壽進而五十蓋其初階也歌曰望東海兮西池氣氤氲
兮光陸離門有霓旌與雲旗君恩渥兮湛露斯吾父壽
兮吾母與之俱枝連理兮案齊眉再歌曰奉慈闈兮紫
玉觴翠雲帔兮黃裳儼中坐兮高堂庭有蘭兮愛日長
八十歲兮春復秋誕欣欣兮樂康三歌曰颺爛斑兮簫
管舉紛拜舞兮兒與女龍之孫兮鳳之侶倚閨闕兮崢
嶸去帝庭兮尺咫義方朗兮慈顏開澹道遥兮容與歌
既畢風氣為之暄妍天日為之朗霽不知蓬壺方丈竟

何如也乃復進從德輩而告之曰孺人與吾家梅淑人
猶姊妹也予視汝父差長一紀則兄弟也是故其情密
其分親不獨譜系著稱吳下也嘉靖辛丑予之乞歸汝
父送之潞河之上信宿而別別復執手曰吾邑風化孝
弟宜先感動誘掖仗兄此行予感其言而愧無以為報
也予少事草堂先生文采道德照映一世兩典大郡為
時名臣筠松府君晚蒙聖恩贈官至詹事學士二老
相驩相敬愛予今老矣猶厯厯記之先姑之舉世安也

府君實命之名曰定芳今日為李氏之甥者尚當為陸氏之甥否乎此汝父所囑之孝弟也於今壽母見之矣惜也汝兄從禮方以詞翰直內閣不及與斯舉儻轉以予言達之則孝弟之風遠播而世澤之垂永永矣因錄為序

封僉憲顧菴潘公八十壽序

東海之上蓬萊方丈之境接焉人多壽考海上之邑環六七百里中涵江湖之秀故多文獻土脉膏沃風氣完

固又多長者我朝文教四訖其在吾邑涵養休息者幾
二百年是故俗益淳氣益厚仁壽之業益以宣朗乃若
當一方之盛以享五福之全則願菴先生潘公其人也
公朴茂誠慎儀觀有顒自一言一動之間具有規矩品
式內外族人賴以師保少負美才有經綸天下之志退
然若不勝衣嘗一仕項城尉屬當時艱修繕城垣平允
刑獄惠政大著而項城之人亦父母之既去猶思而公
口未嘗言功悉卷而懷之故一方之長者莫先焉公有

四丈夫子皆身所為教長恩曰子仁次惠曰子迪又忠
曰子蓋季恕曰子行蔚然詩禮之澤子仁既登甲科馴
服大僚子蓋歌鹿鳴以起子迪子行皆績學橋門光彩
照映故一方之文獻莫先焉壬寅之歲公壽八十一
月廿有六日其初度也適子仁以四川參議遷山東憲
副還乃率諸弟捧觴為壽公以子仁貴始封憲僉初階
奉政宸奎煥然牙緋儼若安坐一堂之上斑斕滿前蘭
玉就列望之者以為神仙而吾邑真蓬萊方丈之境也

邑之親朋皆相約稱壽篚幣牽牲傾動城郭又一方之
盛事抑亦百年之所未有也中書舍人趙君元伯請書
其事以傳予方南歸實倚公為重乃序之曰凡壽敬高
年也敬高年敬其人也是故君臣父子之道系之人倫
經綸禮樂之業本于人事盡倫以舉事此世風之攸關
引而長之稱壽之所為重也夫善莫大於錫類錫類莫
大于忠君忠君莫大于體國我朝帝業度越千古雖然
所藉以為治安者人才焉爾矣若夫訓成作養之方則

天下之賢父兄也惟公善端未易枚舉而諸子乃能發公之藏以需國家治安之用類孰大焉子仁奮迹州郡歷典大藩方當一面之寄忠誠體國柄任伊始子迪兄弟鼎起甲科同心共濟益振潘宗當為荀氏八龍又進而與元愷並傳豈特一方之盛美已也予故論次其大者以復於元伯儻以為然請為公壽謹序

江東藏書目錄序

余家學時喜收書然覩覩屑屑不能舉羣有也壯遊兩

都多見載籍然限於力不能舉羣聚也間有殘本不售者往往廉取之故余之書多斷闕闕少者或手自補綴多者幸他日之偶完而未可知也正德戊辰夏六月寓安福里宿痾新起命童出曝既乃次第于寓樓數年之積與一時長老朋舊所遺厯厯在目顧而樂焉余四方人也又慮放失是故錄而存之各繫所得儻后益焉將以類編入

理學括要序

理學括要凡六卷禮樂之具性命之說萃焉元故黿溪
書院山長樂安詹先生道存所著而其從曾孫東魯君
所編次以刻之松郡者深郡人也使序之曰自昔聖賢
其志廣其學博其守約志廣故欲以成天下之務學博
故必以周天下之故守約故嘗不外乎此心之神明蓋
非約不足以該博非博不足以濟務孔子曰吾道一以
貫之又曰我欲託之空言不若見之行事也顧行之之
序則由身始孟軻氏沒而世儒以功名就世者往往不

知約之守而惟博之務其道則雜未能至於博而或施之應務其術則疎故君子之學鮮矣先生生當濂洛講明之後而又吳文定公之鄉也其學有宗旨大抵本於人倫日用之常以推極乎陰陽造化之變讀是編也可謂有斯志而又有斯學者矣惜也未見之行爾而若有待於今東魯君也君名崇辛未名進士出推一郡者行始也

儼山集卷五十一

欽定四庫全書

儼山集卷五十二

明 陸深 撰

記一

浮山遺竈記

平定之山以浮名者二故稱東西浮山云東浮山在城東五十里餘即女媧氏補天之處其煉石竈尚存山多產石炭勝他產而所產諸色石亦可燒云予嘗荒唐補

天之說今適其地睹其跡於是召其土人問之土人曰
然又問之土人之耆宿耆宿曰然已又問之學士大夫
士大夫又曰然予曰何謂也時僉憲白君實之曰是遺
俗焉可徵已凡吾定之人環而家者以千萬計而附州
者尤密今州居之家復以百千計歲上元之夕無論小
大家家置一鑪焉當戶高五六尺許實以雜石附以石
炭至夜煉之達旦火焰焰然光氣上屬天爲之赤至于
今不廢也是之謂補天子聞之始悟而未有以發也遂

過樂平與太宰白巖先生喬公談浮山及此子以為此
蓋史氏之微詞也要之實理固亦有然按媧皇之興繼
太昊而誅共工是時火德中微生民甚朴想夫茹毛飲
血之外日出而作爾日入而息爾固未能盡火之用也
况鴻荒初開林木鮮少樵薪之利尚微而附麗之機猶
隱媧皇乃察物宜前民用是故制此以通昏黑之變輔
烹飪之宜所以開物而成務蓋曰補天之所不及爾後
世所謂焚膏繼晷燭火代明亦斯義也此誠贊化育之

一端聖人繼作舟車宮室之制安往而非補天也哉補
助也贊也未必盡寓彌縫修綴之義謂因其罅漏而補
塞之讀者不以辭害意可也後世方士家本列子之言以
為燒丹接氣之術故神其事世遂惑焉公大以為然云
此可破千古之疑予許為作辨而未有以復也聊記於
此

徽守南侯復役記

徽父老鄭廉等言於深曰徽郡於江南據大鄣之麓俯

視諸郡地產民力於諸郡特劣而饒富之名顧不後諸
郡是故號難治治之而得民心又難也南侯之治徽三
載矣善政以十百計最得其民心者復役一事尤鉅於
徽蓋百世功也徽之民自是有子孫矣徽之民自是有
田廬矣徽之民自是有殖業矣侯之功安可忘也惟我
太祖高皇帝定鼎金陵太平實首善之地比於漢之三
輔南陽故凡糧科力役獨加優厚若湯沐云近有桀黠
者巧為規避視吾徽猶壑也先是蕪湖役夫使徽代之

繁昌祇候使徽又代之當塗之民復謀以南京兵馬司
弓兵凡四十八名歲以銀計者數百改派於徽徽弗堪
矣由是歛休績祁黥婺六縣之民交訴於朝事下撫臣
都御史毛公馳檄屬郡議其便不便者於是池寧安太
四守臣會于廣德太平林侯議曰太平屬縣地當衝要
水則有遮陸則有驛使符旁午客之貴且重者每一接
待凡費三十金或五十金其下者且十金徽僻處獨無
此改派便南侯曰不然國初都南故雲貴川廣五六省

使道必經采石荻港支應為難未聞告乏今朝廷在北
諸道使客皆由西路豈昔有餘而今反不足耶且太之
糧畝以升計徽之糧畝以斗計自昔經制者固已權輕
重於其間矣近奉部符調發凡坐派若干凡灑派若干
視他郡獨多定額之上供者每歲計銀三萬兩有奇而
不時之需大工之具不與焉徽煩矣改派不便林侯曰
徽善賈多富商是民力有餘也改派便南侯曰徽地狹
民不容居故逐末以外食商之外富民之內貧也徽近

多盜內犯則外移外犯則內索大抵明于法則務傷養其成則滋害皆吾民也實弊矣按會典則戶口之耗者且半凡皆役之重也役之重民之貧也太之戶口視國初不及者才三之一顧可謂徽富而嫁役乎於是林侯語塞議上毛公亟是之而改派之役罷徽之民得復舊規用是以和深聞之曰善乎侯之治徽也其辭不費而利則溥矣其事不煩而民則洽矣其心不黨而隣則睦矣其功不耀而風則逖矣雖古循良茂以加此適侯有

考績之行因錄為贈將以聞於當宁并以慰徽人之心

劔鼎記

海虞王君文潔喜文博古嘗獲一鼎其識曰維紹興丙寅三月己丑太師秦公檜一德協濟配茲乾坤乃作劔鼎賜家廟以奉時祀子孫其永保是蓋宋高宗之所賜而其相秦檜所從受者也文潔讀之愀然憐岳武穆之冤忠而鄙其當時君臣之所為若是棄而勿顧久之當正德辛未秋流賊入江江南騷動文潔又慨然思得若

武穆者之為將而又恐有若檜者以害武穆之成功乃
發憤即家山作萬松樓以祀武穆而以所得鼎奉焉既
又範銅像檜跪於鼎足間若伏罪者以向武穆云是舉
也可謂雄偉不羣者矣而文潔固奇士也哉按史載檜
之殺武穆也在紹興辛酉之冬至丙寅之春乃作家廟
遂有此賜五六年間和議已成忠賢盡擯固自以為百
世之勲也觀鼎銘所稱以君而諛臣若此計一時頑鈍
無耻之士道盛德於前誇成功於後者何限也抑孰知

百世而下人心好惡之公不容泯滅雖聲色之間亦有甚於鐘鼎刀鋸之所及者而況其他哉人可不自力於為善也予嘗道西湖拜武穆墓下睹所謂南枝樹銀瓶井馬又一檜樹中剖而植其前固亦謂之秦檜也疑皆好事者所為又聞湯陰有武穆祠戶外鑄鐵為檜拜馬凡一方疫癘者必禱禱者輒持笞箠踏擊鐵檜或十百千數皆如所祝輒得福事雖涉恠誕於此益以見人心之公而忠賢正氣流行於宇宙間鼓為風霆照為日星

形為川嶽真有不隨生死古今而變者則茲樓也謂非
武穆之所饗耶而文潔固奇士也哉文潔名澄別號竹
泉有子曰授攻進士業質美而勤嘗問學於予者予知
其庭訓義方之貽遺安振宗之具激勸之微權皆類是
余友姚君尚綱最能道之作劔鼎記

江南新建兵備道記

江南之兵備設也自今天子正德始兵備之有官也自
弋陽謝公始先是公以監察御史來按江南當庚午辛

未之際興革舉措屹然不以禍福利害動其心江南以
寧既受代去天子以為明於江南之故會有江上之師
用大臣議設兵備於太倉州乃自御史陟公為浙江提
刑按察副使蒞太倉凡水利屯田鹽法獄訟之類咸屬
焉又聽以法糾察其屬文武吏之職不職者而獨以兵
備名最重也公奉璽書而來知州汪君惇以兵備道為
請乃即水利分司之舊址益以民間地若干畝而即工
焉外建重門凡門之楹若干門內為廳事凡廳之楹若

千翼廳而南者為兩廊凡廊之楹若干綴廳而屬之後者為穿堂若干楹後為寢堂若干楹旁為兩廂又若干楹又別市民地若干為內宅其制視前而為墻門一殺去兩廊少西建樓幾楹以供眺望而穿堂又殺焉又益以屋若干楹凡庖湑溷圜之類備具繚以周垣以丈計者若干經始於七年之秋九月明年二月訖工凡六月嘉定知縣王君某以書屬深記之惟古昔憲王經理之制凡以為民也而兵則惟大惟慎大抵兵不息則治不

興而忘備於無事之日者至戒也竊觀自古頑民之弄
兵未必盡包不軌其始也起於無所彈壓以遂其無所
忌憚之心及其過成惡稔則一切決裂為之至用天下
之力而僅克若近日之用兵皆前日撤備之所致也嗚
呼孰為之哉是故先王所以有禁於將然與救於已然
者其效可睹已仰惟天子除去大慙求復祖宗之經制
若茲兵備之設惟善是從以保佑民宜示有永按太倉
當江海之衝三吳之蔽而金陵之門戶也公既至承天

子德意加以博大練達之才經綸體用之學惟地與民
為久遠規後之來者將尋公之始政而考求之則國家
之幸而江南之民之福亦寧有既哉深故敢列其大者
以告若工費之自出與有事茲役法當牽聯書者勒諸
碑陰

大益書院記

嘉靖十有五年冬大益書院告成書院在今四川省城
之東北隅四川古蜀都而益州蜀古名也惟我朝聲教

暨萬里而四川號稱大藩合今昔之盛以大益名書
院而書院之大者凡以文教輔國政也與古四書院之
制同今天子中興加意文化薄海內外蔚然向風矣而
是院之成適當禮樂大明之後于時四川巡撫都察院
右副都御史西野張公翰巡按監察御史玉洲陸公琳
相與落之而顧謂深宜記深自乙未夏來轄蜀司與聞
斯事稽諸案牒蓋自正德戊寅提督學校僉事王公廷
相實始其事即故少師萬文康公之舊寓前為講堂後

為燕寢翼以左右之室列為五齋進為先賢之祠樹之
門閭繚以垣牆於是書院之體位立矣繼之者副使張
公邦奇端方指授於是書院之師模具矣士之來學者
彬彬然巡按御史盧公雍熊公相助以罰金五百於是
書院之潤飾美矣巡撫都御史許公廷光巡按御史黎
公龍提學副使歐陽公重知成都府劉天澤王遵益以
廡舍實嘉靖之甲申歲也巡按御史范公永鑾劉公黻
相繼買田於雙流以六百金歲入以四百六十有餘石

於是書院之居養裕矣副使江公良貴出學道贖金凡四百左布政使林公茂達按察使許公讚相與佐協以廣門衢之地於是書院之觀瞻勝矣會張公鯤以副使來督學政請于巡按御史熊公爵加理葺焉甲午之歲副使顧公陽和踵至請于巡撫都御史范公嵩潘公鑑再新之於是書院之基構永矣巡按御史鄒公堯臣以爲未足也再檄知府邵經濟拓之潘公申之曰茲惟母後時凡費重以三百金於是書院之圯廢者起矣于時

經濟方有事於學宮謀作鄉賢名宦二祠僉事蔡公復
元適視學曰隘矣書院學等爾宜容有作憲副阮公朝
東適奉璽書議合即請于張公陸公皆報可乃左為名
宦右為鄉賢之祠於是書院之典章大備矣諸生復有
請曰王公實創斯舉且師道傳焉萬公嘗主斯地且相
業懋焉宜像王公於新堂宜俎豆萬公於右祠庶諸生
來游於斯者以無負王公於生以無忘萬公於永永經
濟復以白二公復報可僉同之議亦曰禮以義起此類

是也經濟乃具石請書其事以詔來世按春秋之法最
重興作凡始事必書凡終事必書凡有益於治道者必
書是役也歷年二十經營數公前此所未有也不大益
于蜀乎在易有之震下巽上其卦曰益益之彖曰損上
益下益之象曰遷善改過夫損上益下政也遷善改過
學也學與政通學所以學為政也諸生盍顧名以思義
乎學成而出持是以佐我皇明禮樂之化益之名義
於是為大是書院也殆將與岳麓白鹿媲美矣此王公

建置之本意而諸公作興之盛心也皆不可以不記其
諸牽聯宜書者具之碑陰

留鹿記

東海有邑莆田黃侯實來治之侯之治海也任德而好
古使民各自為便雖三尺之童皆得以謁其所欲於前
退而無不得也其取諸民而用之也自一錢以上度得
已輒已之而民未之或知簿書獄訟之暇其所好尚則
彈琴挽弓投壺歌詩考古文物以求先王之精義庭畜

鹿鶴聽其和平之音翫其潔白之操以養吾之高明而致之用不能委曲與上官遇釣取奇譽以聳動當世之觀聽故民之宜於侯也若羣飲于河各克其量若時雨之浸物皆霑足而不自知其功之及恩之為大也幾考而薦為戶部主事於南京將自海發也其民始慕焉若失而侯亦眷眷於海也顧其二鹿而嘆曰是亦嘗芻飼茲土者耶乃畱之而去陸深曰黃侯於是乎有仁政矣夫仁者之心一視皆同先難而獲是故天下者一邑之

積也萬化者一事之積也萬物者一物之積也古之君子由一事之謹以成萬化之理自一方之治以表萬方之則自一物之愛以至於物物無所不愛故易於近者非知遠者也忽於小者不可與圖大者也天下之情賤目而任耳久矣故嘗以所不見者為奇而忽於其身之所自有其居此也若將浼焉其慕彼也若將跂焉得失之機交戰而靡寧故化理之本搖而仁者之澤鮮矣以侯之才固不難於立致通顯而乃低迴劇縣殆且十年

其來也若將終焉其去也若有受焉非其篤於自信而無所慕於外者能之乎異日居裁成輔相之地無內外無將迎無畔援無歆羨以底同仁之績則斯鹿也固其徵哉士大夫雅知侯者從而歌咏之以比於時苗之畱犢云按苗魏人嘗令壽春始時以一犢駕車而至久之生犢其去也以為非已來時所有之物遂畱之可謂持潔者矣然其區區於子母之間猶有論量較計之私是殆有所慕而為之者耶若侯者惻隱之心隨感而發去

畱之際卒歸於無意此則顏孟之所以為學者而非苗之所知也於是作畱鹿記

上海縣令題名記

上海縣令題名者題今上海縣者之名也石之者示不朽也創之者嗣今上海浮梁曹侯孟輝也由曹侯而上今凡四十有一人其在元者十有二縣元始也元令始於周侯汝楫也由周侯而下列其姓氏以官歷次第之使可考見復虛其左以俟後之令茲縣者題焉是役也

循名以求其實弗替乎舊而引之今侯可謂知體矣縣人陸深記之曰令於縣無所不統令猶令也所以使令一縣之人以知公上尊親之義而和以富壽安逸之福懸以刑賞禮律之文發而出之故曰令蓋言令之而必行也令於民親誨諭訓誠不越乎堂皇之間里閭向方可以徧於時日之內故令之民也便親則有感便則有功此治之基也基於縣而天下運矣基於令而六官舉矣是故令於民也身教之手澤之民之視令也公則官之

私則父母之遇則戴之去則思之歿則神明之尸祝之
此縣令題名之所以不容已也或曰凡是四十一令者
有善乎曰有之亦有不善者乎曰亦有之曰善不善奚
取於茲石哉曰民思其善以忘其不善令監其不善以
底於善此關雎麟趾之意而周官之法度也又曰我皇
明之治體也侯名煜丙戌進士有惠政為縣之三年當
嘉靖之十年是月某日立石

儼山集卷五十二

欽定四庫全書

儼山集卷五十三

明 陸深 撰

記二

荆南精舍記

江南佳山水宜興為最宜興佳山水荆南為最按古陽
羨在宜興今人宜興之境槩稱曰陽羨凡涉宜興之谿
槩稱曰荆南水澄山秀明潤映發表之以銅棺蓄之

以震澤魚稻之佳蒲葦竹箭之利喬松茂林之隱蔽習俗之儉勤人士之朴茂敦讓水旱之災鮮少鳴吠之警曠世不驚加之舟輿室居之堅緻以為息游居起之適洞府之深恠瓌瑋泉石之幽閒供登眺臨賞之勝信絕境也今少保司徒大學士靳公別業在焉有田有廬若將為明農佚老之計者公故潤人也潤有京峴北固之塹拔帶以大江之深長金焦之出塵亦既以効靈會粹鍾為大賢碩輔舒乾坤之秘藏當台鼎之柄任需澤寓

內為茲山川重有如公者又奚羨彼為哉公之言曰潤
天下之要衝也獨形勝乎哉然潤之產常不足以養潤
之人地狹故也以狹地當道衝則善無常資而俗易屢
壞是故潤自吾居之可也顧吾所以遺後者至薄而詔
之以彝禮也至勤其將使後之人守宗祧於此而勤衣
食於彼也故始作堂命曰和義志吾私也命深記之深
退而嘆曰仁哉乎公之垂範也不侈求不拂乎人情不
以崇高為專恃不凝滯於物而有化其稱名舉事不煩

而推類廣勞而有獲久而不可渝秩然享之閭然而無
弊夫仁者之為慮遠邇一也則公之相業從可識矣雖
然觀河洛則思往聖瞻嵩華而考其降神于材賢陶漁
耕稼之必有其地則山川之所賴亦豈細故也哉昔蘇
文忠公軾卜居陽羨至于今談者美之而陽羨因以益
顯按文忠未嘗來居志竟不遂且官止于庶僚動與咎
會學止于文章功名之末猶將借以不朽而況于德業
學術本之聖賢者哉況于子子孫孫克以永世者哉深

不佞姑記其大者異日儻獲從公問學其間亭館樓榭之美卉木之麗時物之變態或能賦之

綠雨樓記

陸子卜居長安爰得高樓碩柱勁梁下為三室悉牖其南高明靜虛是故夏涼而冬溫也以奉吾母吾母喜深退而亦喜登茲樓以望焉面臨廣園南風徐來城堞蜿蜒自東直趨而正陽宣武二門卓立相向若兩山然西山隱起半空纒環奔鬬吐抹雲雨變態立異迴睇崇文

若孤峰插霄平睨則緣城卉木高低隱映萬瓦鱗次如
陳几案都城之異境也背負巨槐團藥扶踈壽可百歲
偃覆簷際每朝暾初起則浮綠滿樓動搖不散因摘古
詩綠槐踈雨之句命之曰綠雨蓋將於此息焉樓既高
爽又洞中含風於燕處不宜乃障其東偏一楹覆以承
塵飾以越楮既具而純白焉純白曰素素存而天下之
變具矣傳曰素位而行故命之曰素軒又障其后為小
室啟一戶與軒通中設木榻一棊几一古琴一銅香鼎

一左居圖右架史正覆槐處也北為兩牕槐幹肖龍每
欲闖牕而入煩暑時於是讀書納涼蓋樓至此窮矣有
潛之義焉故命之曰潛室又啟一戶折而西通中雷榜
曰書窟廣可五尺長丈有咫穴北壁以取明雜藏書三
千卷斯樓之大觀云素軒之東二楹可娛賓時享牕之
外有露臺可眺可坐可翫月或二三良友可觴咏有闌
可箕踞而憑其下有棗當離離時可掇而啖也吾之取
於茲樓備矣夫雨及時也素正行也潛毓德也窟厚蓄

也尚冀無負於茲樓焉

芳洲書屋記

今大參山東俞公正齋讀書之地在錫山之陽環水而羣芳集有勝槩焉故太師李文正公題曰芳洲書屋公既由此取甲科鄉邦之人過而式焉地日益重而名日益有聞歸自南垣嘗讀禮於是然未暇數數然也壬申之春既起掌北垣瞻望日遠其弟震承公之志益事修葺架橋於上以通往來作堂其中以揭文正之篆額既

成而景物愈出矣楊柳之蔭芙蓉之叢益以茂密林之
鳥池之魚四時之花果蔬蕪協候而宣和者不失造化
之妙加以修篁籜而扶疎恠石樹而萃嶺有日新焉南
峙則文筆之聳秀北障則龍山之逶迤枕以故堞帶以
梁溪令人睠焉有忘歸之趣而況詩書之聲猶在道義
之樂具存者乎庚辰之秋公至自東藩謂其友陸深曰
泰寤寐茲地今將老焉子為我記夫林泉之操游息之
居士大夫不可無而亦不可有者也三代而下井田封

建之法廢士失所業故資焉以仕仕因所之而功業見焉雖然得失者命也進退者分也非我之所敢與也合則殉國不可則奉身去而無所託焉然後慕戀之計重而恬淡之節虧矣斯之謂不可無者士之正學久矣故鮮完才氣質者德性之累也勤逸者治亂之分也夫惟榮名焉是蹈而便安之懷則天下之務必有所畧積畧成弊積弊成壞若魏晉之叔季雖有一丘一壑之奇能獨饗乎斯之謂不可有者有無之間君子之所必辨彼

以形勝焉者末也公與深同舉于鄉文學該洽精敏強
毅有天下之才典司諫議忠正和厚意存體國有天下
之志禮闈校士公鑒慎密為內簾冠退而未嘗伐焉有
天下之量方將陟為卿輔舉一世而勤勞之以副天下
之望若是芳洲者固公之所不可無而亦豈宜遽為已
有哉異日荷公之成績朝野又安一夫皆獲然後幅巾
杖藜從公兄弟以周旋於水芳野色之間深也不敏尚
將賦焉是為記

月塢記

金匱張愈光修古學而未有合於今也自蒙以癡人之
號將即月塢之勝而益修焉以告于國子先生陸深曰
舍居大保山中築塢讀書盡山之勝有泉有澗有樹有
卉有園有亭有臺榭有梵宮琳館可遊可憩可騎射獨
於有月為最勝山西峙凡西之山咸拱揖可俯故於得
月為最先月時泉聲澗影樹樾卉蔭園亭臺榭梵宮琳
館參差隱映含輝互彩浮藍盪白若有若無顧而樂之

使人心跡俱泯世界盡失期以終老焉又曰家君督舍
以進士業非古也弗敢廢命則茲山之月之境荒哉斯
非癡乎又曰履靜以強志志強則學就緣癡以崇道道
崇則用光含之志也深覽而異焉語之坐告之曰吾子
用志良勤矣夫君子之學古也道貴弘守貴約動貴時
不弘不足以周務不約不足以致道不時不足以利用
吾子疑於適越而廢冠屨矣冠屨者首足之所用也越
人廢冠屨非能廢首足也故科目者豪傑之所由也非

由科目而豪傑也吾子求道於六籍修辭於兩都誠古
矣今天子置館閣設論思所以華國而經世者非俗學
之所用也吾見子之合也將有日哉請與子論月可乎
月之時用大矣懸象於天敵體於日代明於夜積成於
歲雖然風雨之夕雖望無月晦朔之際雖月無明上弦
之與下弦魄同而進退殊也晨見之於夕見形同而消
長殊也春之溶溶也秋之皎皎也夏之助暑也冬之競
寒也是故月之變屢矣安往而不得月哉三代時士以

選舉漢以經行魏晉以中正隋唐始以進士是故仕之
變亦屢矣安往而不得士哉吾子耽月塢之山水幾于
滯靜而未弘矣薄科舉之委瑣幾于驚遠而未約矣任
氣質以疾疢幾于過動而違時矣愈光瞿然曰含癡庶
其有瘳乎願書為記

晴原草堂記

吾友前光祿少卿賈啟之作晴原草堂既成自徽州貽
書謂上海陸深曰宜有記深方退耕三江之野陟降臯

隰以與老農老圃日相從事校量物宜占測晴雨以觀
天地陰陽之變家本故農有先人之廬中田而植繩樞
葦箔無文章綺麗之飾牕榻潔清取足卧起雜植梅竹
桃柳以為障蔽風日暄和則策短筇選高丘遐觀遠眺
有延陵季子之風三國六代之遺蹟在焉歸而燕坐焚
香讀周易楚詞歌淮南小山之篇自適也每當風雨交
會之期則晦冥黯黯沮洳震蕩亦復無歡閉戶而卧雖
數日可也庶幾哉所謂晴原草堂者深疎慵人也不閑

世務強起從仕今方為世指目分當棄置儻蒙先人之
惠力食是資未為無事辛勤勞勩之餘因以寄吾幽寂
散遠之趣蓋將老焉如先生蚤負重名舉進士為御史
正言直道聳動朝端視師靖邊有文武之畧還陟卿寺
嚮用矣而暫理遠郡固寸陰之游太空耳而必是云云
非深之所敢知也先生之言曰吾少也命名以啟按啓
从啟从日有晴之義吾佩焉及長授詩至小雅之什曰
杲杲原隰曾孫田之按高平曰原田於原焉有無逸之

訓吾愛焉且治田於雨餘乘時也顧名思義此啟之志也深卒書而歎曰啟之今之知道者與天高地下萬物散殊人生于其中經綸繫焉故形而上者七政四時之類皆天也形而下者五嶽四瀆之類皆地也天有陰陽之殊地有險易之辨人有邪正之倫凡陽明之氣為光霽為日星其於人也為高朗為睿聖凡平易之氣為原陸為道路其於人也為博厚為坦夷若夫消長之數治忽存焉君子之所慎也故曰君子之道猶日星然不言

月者陰類也又曰周道如砥君子所履言君子之履無險也晴原之義意在於斯歟有非深之所能知也今天子舉用遺才賜環在邇啟之歸坐廟堂終經綸之業挽回清平淳厚之風以弼成雍熙泰和之治然後明農畎畝及桑榆之未晞餘光所被猶足以映後人人將指之曰此和風慶雲也此泰山喬嶽也則是草堂固當與茅茨卑宮同歌咏於詩書矣豈區區藩牆所敢望哉姑記之以俟

小康山徑記

唐風之詩曰無已太康記亦有之樂不可極極者太過之辭也蓋言樂之不可以過也予謂真樂無過凡言過者皆情欲之感也夫物交於外欲動於中而情出焉順而無制然後流連荒亡沈湎滛泆無所往而不至至於傷性命之正者衆矣若夫無為無求無思無慮無物無我無嗜無好無方無體無所恃而適然悠然而天和熙然而春育廓然而無所於累夫是之謂真樂夫是之謂

不過孔子曰回也不改其樂曾子曰浴乎沂風乎舞雩
咏而歸是物也何過之有予閒居東海身境俱寂既無
富貴功名之想聲色貨賄之奉茲焉素薄身之所到輒
有山水竹樹之勝神契物化恬焉不知老之將至也四
友亭之南有隙地盈丈因聚武康之石作小山具有峯
巒巖壑之趣復作磴路迂迴旁通可登以待月退坐亭
上可以觀雨客曰奇哉山水宜以小武康名之予猶懼
此樂之涉于外而至於過也因題曰小康山徑且以示

戒云丙戌之秋七月既望記

靜菴記

虛靜先生閒居東海之上其覺悠悠其寐休休其耳若目莫之與謀蓋環堵蕭如也靜菴居士大帶垂紳危冠曳履立若山峙默若坎止齋心十旬裹糧千里而來問於虛靜先生曰先生蓋有道者也辭榮就淡樂寂厭紛付功名於鴻毛等富貴如浮雲中腴外槁體隋志勤若輕世絕影而神明為之不分鄙人竊有志焉而未之有

聞也願先生詔之先生曰嘻吾子亦既已知之矣何事
於勤勤耶居士避席曰夫知之非難行則惟先羊亡於
多歧而魚得於忘筌終惠鄙人願先生抽其關而摘其
玄先生曰善哉斯可以語大者也居吾明告子人惟動
物為物之靈未能離物不免役物為物所役斯將化物
物既化矣靈則微矣顛倒紛拏殊適異趨凝定專一乃
與道俱雖然有因有從有覺有識有習有合而後有得
夫所因者資也所從者道也所覺者境也所識者誠也

所習者行也所合者契也所得者德也而無所得也資
不高者不因道不正者不從境不履者不覺誠不孚者
不識行不勤者不習契不投者不合而不得也虛明之
謂資簡易之謂道深艷之謂境超悟之謂誠積累之謂
行融會之謂契相忘之謂得吾子博大高朗不滯於物
偉然端肅語默有常其資乃絕俗矣遨遊湖海觀察近
裏不隨時化所至求縉紳賢大夫而師友之其道則端
始矣家居萬山之中與世紛隔不眩於奇詭巧異之狀

守厥貞一養其端倪而境則有助矣居起游息志於沈
冥神明之府不障不蔽緝熙于光昭其誠則素定矣惟
日孳孳勿迫勿後功利思欲不煩有來其行則有恒矣
跂而若慕退而若終若樂而趨焉若求歸而策焉不有
所利不利有獲其合也妙矣吾子若也循是以往無物
無我無久無暫無內無外無遠無邇其動也不忘其所
謂靜也其靜也不知其所靜也則吾子其有餘師矣雖
然吾子識之哉且二氣五行大用莫過于水火日中致

燐揚而烈之以至于旁燭無疆幽隱畢露可不謂明哉
而欲物物而一之難矣惟水也渟涵汪洋澄澈溶映至
於鬚眉目睫之間罔不洞寫而咸肖故曰能一萬物之
形者也是何也靜故也居士脫然曰某不敏願終身誦
之乃拜下請書為記居士黃姓名緬字惟中徽產也子
思子曰喜怒哀樂之未發謂之中靜故能中云

儼山集卷五十三

欽定四庫全書

集部

儼山集卷五十六

四至

詳校官庶吉士_臣李如筠

中書_臣劉源溥覆勘

總校官庶吉士_臣何思鈞

校對官助教_臣卜惟吉

謄錄舉人_臣蔣雲師

欽定四庫全書

儼山集卷五十四

明 陸深 撰

記三

柱石塢記

儼山西偏澄懷閣之下小滄浪之上復以暇日周施闌檻用備臨觀徙倚之適有川石者三高可丈許並類削成有奇觀焉因錯樹之為三峯中峯蒼潤如玉彈窩圓

瑩豐上而銳下藉以盆石有端人正士之象却而望之
擎空干雲邈焉寡羣豈八柱之遺非耶題曰錦柱傍梵
兩臺其左曰龍鱗石蒼碧相暈比次成文儼然鱗甲之
狀森聳而欲化也其右石首嫩煙而婀娜拱揖有掀舞
之意名曰舞花虬合而命之曰柱石塢曲徑其下以通
往來每當朝日始升夕陽初下曳杖徘徊聊以寄吾孤
岸之氣時時賦王右丞五言短篇或歌陶彭澤歸來詞
一兩解俯檻觀游魚為之一笑意甚樂也客有過者相

攜而共樂焉疑之者進曰古之君子閒居而寡求今之君子退藏而喜事是塢也奚取焉儼山人復為之一笑徐應之曰夫生有定理物有定分各還其分以歸之理古之道也茲數石者遺棄荒林野草之間蛇虺之所蟠牛羊之所礪樵夫牧豎之所踐踏石固無悔也而理有不當然者一旦起而拂拭之立者為峯臥者為岫嵌者突者為巖竇圖者中規曲者中矩抗者若介俯者若委參而列之者若同志孤者無黨正者不倚各還於理斯

固其分也而石又何加損哉乃若君子之取諸物也近而遠粗而精一以貫之獨非古也乎且予之理是也役數夫之力假旦夕之工高卑以陳動靜以位清濁以判治忽以區夷險以奠不曰儉操而博取乎吾子殆求之形跡之際末矣客起曰槩于理遂書為記

玉山書院記

古以書院聞者嵩陽睢陽嶽麓白鹿並謂之四書院今白鹿在大江西最顯而廣信亦以鵞湖聞是二者皆以

吾朱子為之重也玉山在淦淦志稱玉笥山廣信南壤
相接也未聞所謂書院者今有之則自謝氏父子始謝
於淦右族也與善封君謝氏之良者也既得地于玉笥
麓極形勝之美其子今京衛參軍貴謀曰佳哉即與吾
一家有之乎其將與衆共之也與善君曰良是於是書
院建矣相與鳩工遴材卜日集事正方表位以大厥規
中為堂曰會講後曰與善傍列兩齋左曰精義右曰麗
澤出精義左上為樓以庋經史曰寶墨為庖湍所具器

什繚以周垣東置良疇為廩入曰閱稼西為射圃有亭
曰游藝弦誦以時養習有地合鄉之人與族之子弟於
是學焉前啓修途曰雲徑值途作亭曰禮賓右有清池
池上曰洗玉亭左為方塘塘上之亭曰天光雲影其後
為綽楔曰綠陰深處下有尋樂窩右偏之池為觀蓮復
亭其上曰理窟名義惟良築鑿有煥而皆為書院設也
既成取山名名之曰玉山書院邦之人士相與登與善
堂落焉仰而歎曰與善之義大矣謝君之志也盍以謂

君遂共稱之曰與善而不名云既有年矣正德二載參
軍始以狀來請記余惟今之書院與古鄉學之意同今
之學與古之所謂學者抑亦有同乎否也夫學至朱子
大備矣自本以趨末明體而適用此朱子之所謂學也
况江之西又朱子杖屨所及之地玉山之學者儻有聞
而興起焉斯地也安知不與白鹿鷺湖並聞乎又安知
不與四書院者相無窮乎此則謝氏之功也不可以不
記是役也吾惟列其大者若夫工役豐浩謝氏之所優

為者宜不書與善名乾錫以子封其行義類書院之為者貴字敏德向用蓋未艾云

可齋記

鄭顯於歆蓋自前代已然矣有字子美曰師山先生者故忠義士也其後嗣之良者廉字宜簡今行義人也宜簡遊四方將大觀焉以承其家再至京師請于余曰鄙人不佞思立於寡過之地顧未有聞焉爾雖然名以命我字亦牖我惟廉惟簡以是號於人久矣一言而終身

行之取諸近者惟先生詔之余曰諾是可與語者別號之曰可齋宜簡有間曰鄙人不文敢不惟先生之教竊願有謁焉天地之化一陰一陽人理之趨一邪一正衷心之制一是一非名行之立一善一惡其歸殊也茲欲靡然惟可之從殆未知何途之適也惟先生盡之余曰然是可與語可者告之曰至善者天之命也至不齊者造化之迹也不可不主一者人之心也是故有可者有不可者有可不可之間者可乎不可乎不可夫是之

謂可故世無兩可之說操兩可者皆不可也可以為善
必不可以為惡可以為君子必不可以為小人故曾子
曰可以託六尺之孤可以寄百里之命至臨大節則不
可奪是可不可之辨也且辨乎此而後名立而後行成
而後過寡矣天下之勢無而之有簡而之繁也其於人
也多蓄必厚亡善動必屢悔廉則寡取寡取則無厚亡
簡則有制有制則無妄動可之道也善之積也君子之
歸也雖然於陵仲子非不能寡取也而辟兄離母則不

可子桑伯子非不能慎動也而廢棄冠裳則不可宜簡
歸而求之二者之間去其不可以適於可夫是之謂可
宜簡再拜曰鄙人不敏築室於黃山之麓書諸壁間以
為記

黃山樓記

黃山雄峙實當新安之境多偉麗卓絕之觀森然矗然
而峯者至三十六若王公大人者年尊宿頡頏於霄漢
風埃之上使人起敬起仰於數百里之下大抵融結厚

而氣勢盛猶之於人也涵養深而道德著矣故曰泰山之於丘垤類也鄉先生黃公質夫致藩參而歸築樓其麓當之凡黃山偉麗卓絕之觀霄漢之韻賞數百里之仰望皆不越几席而盡之榜曰黃山樓最勝也先生日登斯樓顧而樂之節宣四時寒燠之宜乘早暮氣候之變有會於中即命酒獨酌身被野服手執如意擊欄楯為節歌之歌曰山中兮白雲英英兮欲雨羌攬結兮不能時來宿兮簷下叶又歌曰山中兮有芝聊采之兮以

療予飢望西山兮崔嵬思佳人兮不可期又歌曰山有
木兮木有桐有烏集兮文厥躬夕陽兮高逝嗟矰繳兮
徒工歌闋聲出林木若鸞鶴之噦層雲時人莫測也新
安人士云爾君子聞之曰博哉先生之有取於黃山也
夫物以象德德以類求斯逝川所以興嗟仁者然後能
樂也且夫山類能出雲雨豐財殖以利物物利矣山無
與焉先生以名進士為良有司入柄郎署出參大藩餘
三十年矣計其利物之功何限也殆無蹈止足之戒乃

頽然自放於斯樓之中與煙霞泉石侶先生又何與焉
記曰舜禹有天下而不與言舜禹之能不與也夫能不
與則其德備矣乃作登樓歌三闋若以和先生之辭者
俾新安人士持歸為先生壽且以為樓記歌曰登樓兮
蒼莽萬里兮在下送予目兮扶桑會懸車兮駟馬架金
碧兮有煌俯茲山兮既長酌沆瀣兮欲咽極予心兮羲
皇樓中何有兮有圖有書招仙人兮與居齊萬物兮一
瞬何非是兮乘除

玉泉記

歙之潛川玉泉在焉潛川之汪歙著姓也而舊一樂翁者汪之彥也翁故有行誼嘗思以利澤其一鄉人歙據江南上游黃山其鎮也潛川依山厥維高亢齒聚繁衍每秋夏之交民實病沒翁所居之左泉發地中涓涓不絕翁顧而樂焉曰茲鄉之利澤庶其在是乃疏導之匯而為泉往來井井厥有利哉歲既久漸就堙圯翁之澤幾微矣翁之孫維翰鍾情其地喟然歎曰茲惟一鄉之

利哉茲惟我祖之志哉夫利有弗廣非仁也志有弗承
非孝也汪之宗又安用維翰為惟仁惟孝實維翰之責
也於是募工伐石深鑿而堅甃之視昔有加而泉遂澄
泓淵澈厥維永永潛川其利哉泉色潔白味清冽甚淙
淙然有聲若鳴珮環甚可樂也維翰遂以玉泉聞人稱
之曰玉泉子間來請記余告之曰玉天下之至白也泉
天下之至清也記曰君子比德於玉孟子曰源泉混混
不舍晝夜復以比德焉汪君其尚有取於是哉雖然玉

天下之至貴也泉天下之至多也人之情得無惑於難得而忽於近且易哉然玉之用虛而泉之用實以其至貴麗於至多合而一之則天下之利澤其有窮哉何特一鄉井而已此汪君之志也惟仁人惟孝子汪君其尚勗哉乃斂衽起謝曰玉泉之義大矣維翰不敏敢敬承君子之教請書為記維翰字宗臣僑儻好禮越國之後蓋故家文獻云

蒲山書屋記

蒲山書屋者歙士鄭子晦之所建也建以教其子若弟子若弟奉教以承鄭之先是子晦之志也既成其族之彥子西記之子晦復走東海乞余記余嘉其志為之記曰先王設教俾人復性焉爾矣故有小學有大學有序有校有辟雍有類宮皆為教也故自言語動息飲食男女衣服冠冕禮樂射御書數皆教事也故由暗室屋漏朝廷宗廟山川華夏霜雪雨露窮通險易皆教之地也是故有一代之教有一國之教有一鄉之教有一

身之教其義一也自古官教外別有書院之制若白鹿
岳麓之類所謂四大書院以義起者也今制自兩京國
子監之外府衛州縣皆有學而書院之設尤多若茲書屋
者又書院之義起歟雖廣狹不同其為教一也準之於
古蓋在黨塾之間其教於一家者乎夫一家者天下之
積也士修於家以效於天下故曰教也者效也然則一
家之有賢父兄與天下之有賢師帥其道一也子晦其
人傑也哉是可以知矣子晦名炳師山先生之後少從

其父嘉興府君宦遊博洽清修有志於復性之學自以
為不獲效用於世而欲振其學於後之人其於是書屋
也甚力鄭之子若弟羣而聚焉學而思焉當山川之形
勝據棟宇之輪奐資經籍之儲峙遠有賢祖先近有賢
父兄盍亦知所自奮哉夫性不遠而復者也孟子曰學
問無他焉求其放心而已矣如以文詞焉爾矣如以功
利焉爾矣如以榮華焉爾矣豈子晦之志哉蒲山在今
歙之雙橋之北師山遺跡在焉書屋之役子晦優為之

茲不記

南泉記

南泉古靈江也在今台之臨海越西南諸山起為天台
赤城之勝含蓄靈秀東盡於海故曰臨海之域有二水
焉溪清而江濁其在城南流者曰靈江或曰澄江云上
接三江下引海門晚潮初上若拖白練於紫翠之間諸
峯環列俯視之歷歷可數也王先生敬忱家于其上顧
而樂焉遂自號曰南泉子南泉子少有大志不屑屑事

家人生產又不喜為舉子業孤岸樸靜淡如也年六十
不識官府人稱之曰南泉翁云翁平生與人交不為歛
曲罩籠之態遇有過必面折之人有陰事獨不肯談有
談人陰事者必趨而避之人故以是德之稱長者云曾
次夷曠若澄陂渟淵涇渭甚辨尤不喜人穢濁之跡每
聞官府貪墨輒拍几大嘯怒隱隱不能休獨之泉上睨
而歎曰何以異於是清者水之本也濁者水之蔽也已
乃掬而揚之曰何以異於是定者清之路也雜者濁之

門也既而仰天祝曰有不返於本而祛之蔽者非夫也
暇日或從諸父汎舟泉上徜徉容與出沒於鷗波蜃樓
之間以滌塵坐而游高明甚適也興酣耳熱則又從而
歌之歌曰泉之清兮侯正命兮泉之濁兮德斯病兮由
是聲出金石振盪於兩涯風波為湧人望之以為神仙
云莫測也嘉靖甲申歲翁就養于松初翁別族於范氏
凡數世矣始復王姓是為車溪之王王范俱宋宰執裔
至今為台名家云翁有子度字律生舉進士在第二甲

格當有官於京朝以獨子請便祿遂得教授松郡教授
君恭行孝敬敦本復古之訓諸生化焉相率候翁起居
於歲時更相謂曰先生之教我至矣固翁之道也其何
可忘乃撮其事以告深聞台榭山海之瓌瑋志稱人神
壯麗意者必有異人出於其間今世台士大夫尤以氣
節廉介聞天下至有委身贊國忠烈貫世者顧其涵濡
觀孚之久又不有超出而獨詣者乎其南泉翁之謂與
夫名山大川為國鎮藪非徒以其崢嶸浩渺之觀已也

蓋曰輔陽相陰產材育物與道為體功在萬世其降為
偉人鉅公經綸天地之宜修明禮樂之道與國咸休功
在本朝有若人焉不在其身則在其子孫其南泉翁之
謂與諸生張其性輩合數百人請書為南泉記因以為
翁壽

栢崖記

義水之上嶄然秀而蔚然深者栢崖也尚書民部郎中
陳君德階少日讀書其下既以科第起矣而仍之曰栢

崖者志也君子之志其取諸物也博而其功業之至也
嘗與其物類孔子曰仁者樂山知者樂水著其志也志
有定而功業從之矣故曰君子不凝滯於物今夫栢之
為物木也其材良栢於崖焉其託固而其成大其色茂
以悅其凋後其用可以任重而傳之遠德階之先以道
德文章顯者數世矣家學淵源固已若樹崖之栢根深
而地絕也養之深厚則蔥蒨涵鬱之色即之而蔭望之
而竦容也抱懷利器閔厥聲采若方春之栢退然而不

與羣卉競榮也筮仕之始獨任遠縣若落落澗谷而無
悔也東莞之治也適權雄變法之際確然之守則又早
霜先霰之集而不挫也比奉璽書出督江南上下允賴
固栢之舟車乎越川度嶺濟世險艱也異日棟大厦柱
廟堂奠安鞏固垂之百世而不朽君子將指栢崖而槩
之曰德階之志有素定也若夫崖之邃幽孤峭足以游
高明而出塵坌景物之態四時不同而早莫變也才客
墨卿或能賦之而深特記其志之有取也若是

儼山集卷五十四